

11. november 2016

**Apeqquteqaat aallaavigalugu oqallinnissamik siunnersuut: Ineqarnikkut aaqqissusseqqinnerup innuttaasunut amerlanerpaanut ataavarnerusumik iluaqutissanngortinnissaa qanoq qulakkeerneqarsinnaava aammalu inuiaqatigiit akornanni akissarsiakinnerit akunnattumillu isertitaqartatut akilersinnaasaannik ineqarnikkut qanoq aaqqissuusisinnaavugut.**

(Inatsisartunut ilaasortaq Jess Svane, Siumut)

Inatsisartunut ilaasortap Jess Svanep Siumumeersup apeqquteqaat aallaavigalugu oqallinnissamik siunnersuutaanut imaattumik Siumumiit oqaaseqaateqassugut.

Siusinnerusukkulli Siumumiit oqariartuutiginiikuurput soqutigilluinnaratsigu ullumikkut innuttaasut sumiiffippassuarni ineqarniarnermini atugarisaat pillugit oqallinnissamut peqataassalluta. Matumani aamma ineqarnikkut aaqqissusseqqinnissap innuttaasunut amerlanerpaanut iluaqutissanngortinneqarnissaanut atatillugu oqallissaarutip siunnersuuteqartumit qaqilerneqarnera Siumumiit ilassilluarusupparput.

Siumup pingaartutut isigaa innuttaasoq kinaluunniit akissaqartitsiffigisaminik, najoruminartumik kiisalu isumannaatumik ineqarnissamut pisinnaatitaaffeqassasoq. Kialaamut iserfissaqarluni angerlarsimaffeqarneq nunami maani pingaaqaaq, taamaattumik ineqarneq illuuteqarnerlu pillugit inatsisitigut pitsanngorsaaajuarnissat Siumumiit pingaaruteqartutut isumaqarfigaarput.

Siumumi ilisimavarput sineriassuatsinni piffiit ilaanni illut inissiallu amerliartuinnartut inueruttalersut, tamannalu ilaatigut inuit najugaqariaasiannik tunngaveqartoq aamma ilisimallutigu. Taamatuttooq aamma ilisimavarput sineriassuatsinni illorpassuaqartoq inissiarpassuaqartorlu ukiorpassuarni annerusumik aserfallatsaaliorneqarsimannngitsunik, ilaatigullu tamakkua aamma kingunerai illut inissiallu pitsaassutsimikkut appasissumik inissittarnerannik.

Siumumi tunngaviumik isumarput eqqarsaatigalugu inuit namminerisamik illuutitaarsinnaaneritut ineqalersinnaanerinullu periarfissat nukittorsarneqartuarnissaat aqutaasariaqartoq isumaqarpugut, kisialli aamma innuttaasut ineqarnikkut attartornikkut periarfissaasa killiffiat tamakkii-sumik nalilersorneqarnissaa kissaatigaarput, taamaaliornikkut iluarsartuusseqqinneq eqqortumik isiginnilluni ilusilik pilersisinnaaqqullugu.

Oqallinnissamik siunnersuuteqartup qulequttat qaqiligai eqqarsaatigalugit annertuumik ineqarneq pillugu aaqqissusseqqinnissap pisariaqalivinneranik aallaaveqartut Siumumi isumaqarpugut. Namminerisamik initaarnissamut atatillugu periarfissat nalilersortariaqarput nutarsaavigalugillu, inissianik ullutsinnut naleqquttunik sanaartornerit avataasigut inissiat nutarteriffigissallugit aningaasaliiffigineqarsinnaasut aningaasaliiffigineqartariaqarput, ineqarnermut tapiissutinut tunngasut nalilersorneqartariaqarput naleqqussaavigalugillu, akileraarutitigut oqilisaasisinnaanerit tamanut periarfissiissutigineqarsinnaaneri isumaliutigisinnaasariaqarpoq allarpassuillu.

Ineqarneq pillugu iluarsartuusseqinnissaq pisariaqalivissoq Siumumit isumaqarpugut, taamaattumillu aaqqissusseqqinneq tamanut peqataatitsiffiusoq aallartisarneqartariaqarpoq, taamatuttooq inuiaqatigiinni innuttaasut amerlanerpaat, tassalu akissaatikitsut akunnattumillu isertitallit ineqar-

nikkut akiliisinnaassutsimik pitsaaneruseq atugaqalernissaat alloriarfigineqartariaqalersoq Siumumi isumaqarluta.

Naggataatigullu Naalackersuisut Ineqarneq pillugu iluarsartuussinissaq 2015-imili ingerlanniagaat sumut killinnersoq Siumumiit erseqqinneruseq paasisaqarfigerusupparput, suleriaqqinnissallu qanoq ittut suullu Naalackersuisuniit ingerlanniarneqarnersut assorsuaq paasisaqarfigerusullutigik. Pisariaqalivippormi iluarsartuusseqqinnissat timitalersussallugit.

Taamatut Siumumiit oqaaseqaateqarluta Inatsisartut oqaaseqaatissaattut siunnersuut tamakkiisumik taperserparput.

Anders Olsen  
Siumut